

**MOP. MS MAKHANYA, MOGOKGO LE  
MOTLATSAMOTŠHANSELARA  
YUNIBESITI YA AFORIKABORWA  
MOLETLO WA SEMMUSO WA GO SAENA:  
MEMORANTAMO WA DITUMELANO MAGARENG GA  
TOROPOKGOLO YA JOHANNESBURG LE DITHEO TSA  
THUTO E KGOLWANE  
LABONE, 05 SEETEBOSIGO 2019  
BOALO JWA BO16, BOLOKO A, TIKWATIKWE YA  
METROPOLITAN,  
158 CIVIC BOULEVARD, BRAAMFONTEIN**

Ke a leboga, Motsamaisatiro: Mokhanselara Ngk. Valencia Ntombi Khumalo (Tokololo ya Komiti ya Ratoropo: Corporate & Shared Service, Toropokgolo ya Johannesburg)

- Mokhanselara Rre Herman Mashaba, Ratoropomogolo: Toropokgolo ya Johannesburg
- Mokhanselara Ngk. Mpho Phalatse (Tokololo ya Komiti ya Ratoropo: Boitekanelo & Tlhabolololoago, CoJ
- Moporofesara Tshilidzi Marwala, Motlatsamotšhanselara & Mogokgo: Yunibesiti ya Johannesburg



- Moporofesara Adam Habib, Motlatsamotšhanselara & Mogokgo: Yunibesiti ya Witwatersrand
- Rre Jan Erasmus, Tlhogo ya Namaotshwere ya Setlhopha: Setlhopha sa Kgokaganyo le Dikamano tsa Togamaano ya Pholisi, Toropokgolo ya Johannesburg
- Ngaka Ndivhoniswani Lukhwareni, Motsamaisi wa Toropokgolo: Toropokgolo ya Johannesburg
- Badiramogo le nna kwa Unisa le badiramogo go tswa kwa ditheong tse dingwe
- Baeng ba ba tlotlegang, bomma le borra

Ke itse gore ke bua mo boemong jwa Lekgotla la Unisa, Botsamaisikhuduthamaga, badiri, baithuti le baamegi fa ke re ke itumeletse go nna karolo ya Memorantamo ono wa botlhokwa wa Ditumelano.

Unisa e setse e saenile Memorantamo wa Ditumelano o o tshwanang le ono le Lekgotlatoropo la Tshwane mme re itumeletse go atolosa tirisanommogo ya rona go akaretsa Toropokgolo ya Johannesburg le diyunibesiti tse di tlotlegang tsa lelapa la etsho tsa UJ le Wits. MoU ono ke ponagalo ya tirisanommogo ya togamaano e go dumelanweng ka yona mmogo le maitlamo a a tlhakanetsweng a go dirisa letlotlo le boitseanape jo bo tlhakanetsweng jwa botlhale mmogo le ditlamelo le bokgoni, mo go tswelletseng diponelopele tsa rona le ditsereganyo tsa togamaano le tiro. Ke tirisanommogo e e ungwelang botlhe e, fa e ka



dirisiwa ka botlalo, e nang le bokgoni jwa go tlhagisa dipoelo tse di anameng e bile di le bokao mo baithuting ba rona le baagi ba Johannesburg. Seno, go ya ka nna, ke tlhagiso ya nnete ya *ubuntu* gongwe botho. Ke dikgakgamatso tse di diragalang fa batho ba dira mmogo ka maitlhamo a a tshwanang a go fitlhelela tshiamo e e tshwanang – go sa kgathalesege gore ke ba makoko afe a sepolotiki gongwe mananeo a bona ke afe.

Ka jalo, MoU wa gompiano e botlhokwa ka ntlha ya mabaka a le mararo. Sa ntlha, ke pontsho ya tirisano mmogo e e dirisegang e e kgonegang mme e sa lekanyediwa gongwe e sa lebelela fela dikgatlhego tsa maphata gongwe melelwane, fa go na le keletso ya go tlhagisa maitlamo a rona ka boammaaruri – bosetšhaba le mo kontinenteng – malebana le Tsosololo ya Aforika (Borwa). Ke bua jaana gonne go tswela go bonala gore go re re gole, re tlhoka go dirisa ditlamelo le bokgoni botlhe bo re nang nabo mmogo, mme e nne rona bathadisi ba katlego ya rona. Rotlhe re na le maikarabelo.

Sa bobedi, dikgolagano di tshwana le tseno di tlhagisa temogo ya rona mmogo ya maitlamo a rona a a tseneletseng go baagi ba rona – le maikemisetso a rona go tshwaela ka tsela e e bokao e bile e ka lekanyediwa mo diphetogong tse re batlang go di bona mo matshelong a bona, mme ka ntlha ya seo, mo ditšhabeng tsa rona le Kontinente ya rona.



Mme sa boraro, jaaka diyunibesiti mo kgaolong, re na le kgatlhegelo ya go bona kgaolo e atlega go ralala dintlha tse robongwe tsa ditlapele tse di supilweng mo MoU ono. Rre Ratoropo, katlego ya lona ke katlego ya rona mme go nnela leruri ga lona ke go nnela leruri ga rona. Diyunibesiti tse tharo tsa rona di na le sefala se se boitshegang sa bokgoni jwa boleng jo bo kwa godimo, jwa maemo a a kwa godimo jo bo ka dirisiwang go ralala maphata a le mantsi go tshegetsa ditlapele le diponelopelo le ditogamaano tsa rona tsa ditheo. Re tlaa diragatsa seabe sa rona.

Ga ke na pelaelo ya gore kgolagano eno e tlaa re ungwela mmogo, mme ke na le tsholofelo – le tumelo – ya gore botsalano bo re bo simololang gompiano bo tlaa gola mme bo tswele dinaga tsa rona mosola mo dikgweding le dingwageng tse di tlang.

Ke a leboga!

